

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ԲՈՒԷՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Ը. Տարի, Թիւ 343, Ուրբաթ, 22 ՅՈՒՆԻՍ, 2016

ՀԱՄԱՅՆՔԱՅԻՆ

«Պէտք է դառնաք համահայկական շարժման մաս» . ՀՀ սփիւռքի նախարար Հրանուշ Յակոբեան



Յուլիս 19-ին ՀՀ սփիւռքի նախարար Հրանուշ Յակոբեան ընդունեց հալէպահայ ազգային գործիչ, բժիշկ, Քուէյթի հայկական դպրոցի նորանշանակ տնօրէն Ներսէս Սարգիսեանը եւ նոյն դպրոցի փոխտնօրէն Կարօ Ասլանեանը:

Ողջունելով հիւրերը՝ ՀՀ սփիւռքի նախարարը հետաքրքրուեցաւ Սուրիոյ

ներկայ իրավիճակով, Հալէպի հայկական համայնքի ինդիւիդուալ, մտադրութիւններով: Քննարկուեցան համայնքային հարցեր, ինչպէս նաեւ՝ անհրաժեշտութեան պարագային Հալէպէն դուրս գալ ցանկացող մեր հայրենակիցներուն Հայաստան տեղափոխելու հնարաւորութիւնները:

Նախարարը ուշադրութեամբ լսեց Քուէյթի համայնքային, կրթական հարցերու, յաջողութիւններուն մասին, ուրախութեամբ արձանագրեց, որ Քուէյթի համայնքը փայլուն համայնք է, հայոց լեզուի պահպանման, մասնագիտական կրթութեան, ազգային ինքնութեան, մշակոյթի պահպանման հարցերը բաւականին բարձր մակարդակի վրայ դրուած են: Բայց աւելցուց, որ համայնքին կապը Հայաստանի, մասնաւորապէս՝ Սփիւռքի նախարարութեան հետ, միւս համայնքներուն հետ համեմատութեամբ, աւելի թոյլ է:

Նախարարը կարեւոր համարեց համայնքի մասնակցութիւնը համահայկական շարժումին, կոչ ըրաւ մասնագիտական խումբեր ստեղծելու, մասնակցելու լրագրողներու, իրաւաբաններու, բժիշկներու, ճարտարապետներու եւ նախարարութեան նախաձեռնութեամբ կազմակերպուող մասնագիտական համաժողովներուն, ինչպէս նաեւ նախարարութեան կարեւոր ծրագիրներուն՝ «Սփիւռք» ամառնային դպրոցի դասընթացներուն, «Արի տուն» հայրենաճանաչութեան ծրագիրին եւ «Իմ Հայաստան» փառատօնին: Ան մասնաւորապէս նշեց. «Դիմում եմ ձեզ, քանի որ դպրոցն է համայնքի սիրտը, ոգևորէք, աւելի ակտիւացրէք, աւելի ամրացրէք կապը, աշխուժացրէք Հայաստան-Սփիւռք, Սփիւռք-Սփիւռք գործակցութիւնը, որ շաղախուէք ամբողջ հայկական սփիւռքի հետ: «Պէտք է դառնաք համահայկական շարժման մասը, սա իմ խնդրանքն է ձեզ: Մենք սիրով ձեզ սպասում ենք եւ պատրաստ ենք բոլոր հարցերով օգտակար լինել»:

ՄԵԾԻ ՏԱՆՆ ԿԻԼԻԿԻՈՅ ԿԱԹՈՂԻԿՈՍՈՒԹԵԱՆ ԵՐԻՏԱՍԱՐԴԱԿԱՆ ՄԻՋ-ԹԵՄԱԿԱՆ ՀԱՄԱԳՈՒՄԱՐԸ

Յուլիս 14 2016-ի յետմիջօրէին, Մեծի Տանն Կիլիկիոյ Կաթողիկոսութեան Եպիսկոպոսարանի սրահէն ներս տեղի ունեցաւ միջ-թեմական երիտասարդական համագումարի Ա. նիստը: Նիստին բացումը կատարուեցաւ «Տէրունական» եւ «Զգործս ձեռաց մերոց» աղօթքներով:



Ապա, ժողովականները լսեցին Կաթողիկոսարանի Երիտասարդական Բաժանմունքի գործունէութեան եւ աշխատանքներուն ամփոփ զեկոյցը, որմէ ետք յաջորդաբար իրենց զեկոյցները ներկայացուցին Արաբական Միացեալ Էմիրութեանց ու Քաթարի, Քուէյթի եւ Պարսկաստանի թեմերուն ներկայացուցիչները, որոնք լուսարձակի տակ առին իրենց շրջաններէն ներս կատարուող երիտասարդական ազգային-եկեղեցական գործունէութիւնը, երիտասարդութեան պատկերն ու վիճակը, ինչպէս նաեւ մարտահրաւերներն ու առաջադրուած հարցերը:



Բ. Նիստի ընթացքին Մեծի Տանն Կիլիկիոյ Կաթողիկոսութեան Դպրեվանքի Տեսուչ Գերպ. Տ. Թորգոմ Ծ. Վրդ. Տօնոյեան դասախօսութեամբ մը ներկայացուց Հայ Եկեղեցւոյ ծագումը, կատարեց Կիլիկիոյ Կաթողիկոսութեան ամփոփ պատմականը եւ անդրադարձաւ անոր կարեւոր դերակատարութեան Սփիւռքի մեր գաղութներէն ներս: Երեկոյեան, համագումարի



մասնակիցները հանդիպում-զրոյց ունեցան Հայ Երիտասարդական Համալսարանական Ուսանողական Միութեան (ՀԵՀՈՄ) անդամներուն հետ, որուն նպատակն էր մօտէն ծանօթանալ Կաթողիկոսարանի հովանիին տակ գործող ուսանողական այս միութեան գործունէութեան:

www.aztarar.com

ՀԱՅԿԱԿԱՆ

«Դաշնակցութեան Կեցուածքը Միշտ Եղած է Այն, Որ Երկրին Մէջ Պէտք Չէ Ցնցում Ցառաջացնել» «Վանայ Չայն»-ին Կ'ըսէ Կիրո Մանոյեան

ՀՅԴ Բիւրոյի անդամ, ՀՅԴ Բիւրոյի Հայ դատի եւ քաղաքական հարցերու գրասենեակի պատասխանատու Կիրո Մանոյեան Չորեքշաբթի օր՝ 20 Յուլիսին «Վանայ Չայն»-ին հետ ունեցած կարճ գրոյցին ընթացքին ներկայացուց 17 Յուլիսին Հայաստանի մէջ տեղի ունեցած դէպքը, անոր տուն տուող պատճառները եւ անոր լոյսին տակ տիրող ներկայի վիճակը:



Անդրադառնալով ստեղծուած կացութեան եւ տեղի ունեցող զարգացումներուն նկատմամբ Դաշնակցութեան դիրքորոշման՝ Կիրո Մանոյեան ըսաւ, որ ՀՅԴ-ն առաջին պահէն իր կեցուածքը արտայայտեց, երբ ՀՅԴ Գերագոյն մարմինի ներկայացուցիչ Ադուան Վարդանեան ըսաւ, որ մենք նման մօտեցումներով, նման քայլերով երկրին մէջ անհրաժեշտ փոփոխութիւններ կատարելու փորձը սխալ կը նկատենք, անկախ անկէ, որ երկրին մէջ փոփոխութիւններու կարիք կայ, եւ Դաշնակցութիւնը եղած է այն քաղաքական հիմնական ուժը, որ նման փոփոխութիւններու անհրաժեշտութեան մասին բազմիցս խօսած եւ տարբեր ձեւերով բարձրաձայնած է, իսկ այսօր այդ նպատակով քաղաքական համախոհութեան մաս կը կազմէ:

Ուստի, Մանոյեան շեշտեց, որ այս ձեւով չէ, որ երկրին մէջ փոփոխութիւններ կը կատարուին:

Ան լուսարձակի տակ առաւ այն երեւոյթը, որ ասիկա Դաշնակցութեան համար նորութիւն չէ. յիշեց 1992 թուականը, երբ Դաշնակցութիւնը Հայաստանի մէջ ուղղակի թիրախ դարձաւ, իշխանութիւնները երկրէն արտաքսեցին օրուան ՀՅԴ Բիւրոյի ներկայացուցիչ Հրայր Մարութեանը, իսկ 1994-ին կուսակցութիւնը կասեցուեցաւ Հայաստանի մէջ, շարք մը գրասենեակներ փակուեցան, կարգ մը կուսակցականներ ձերբակալուեցան: Այս բոլորով հանդերձ, Դաշնակցութեան կեցուածքը միշտ եղած է այն, որ երկրին մէջ պէտք չէ ցնցում յառաջացնել՝ նախ իբրեւ սկզբունք, բայց նաեւ նկատի առնելով այն, որ երբ կայ Ղարաբաղեան տագնապը, այս ձեւի ցնցումները կրնան միայն վնաս հասցնել, ուստի ճիշդ չէ այս ձեւով հետապնդել փոփոխութիւններու իրականացումը:

Մանոյեան դիտել տուաւ, որ միւս կողմէ ոստիկանութիւնը եւս պէտք է ճիշդ վարուի, քաղաքացիներուն իրաւունքը պէտք է յարգուի, համախմբուիլ ուզող քաղաքացիները պէտք է ասիկա ընելու կարելիութիւն ունենան, բայց նաեւ պէտք է հասկնալ, որ երկրին մէջ ստեղծուած է ապահովութեան սպառնացող վիճակ, որ ի վերջոյ պէտք է չեզոքացուի: Ուրեմն բոլոր կողմերն ալ պէտք է ամէն ճիգ ի գործ դնեն, որպէսզի այս վիճակը նոր գոհերու պատճառ չդառնայ եւ առանց յաւելեալ վնասներու եւ կորուստներու աւարտի կարելի եղածին չափ շուտ:

Թուրքիոյ մէջ յեղաշրջումի փորձի ձախողութեան մասին խօսելով՝ Կիրո Մանոյեան դիտել տուաւ, որ այս ձախողութեան հիմնական պատճառներէն մէկը բանակին միակամ չըլլալն էր, որովհետեւ անցնող տարիներուն իշխող կուսակցութիւնը համակարգային որոշ փոփոխութիւններ կատարած էր, բանակին մէջ քատրային փոփոխութիւններ ներմուծած էր,

ուստի բանակի ղեկավարութեան կարելոր մէկ մասը համախոհ է այսօրուան իշխանութեան, այդ պատճառով ալ յեղաշրջումը ձախողութեան մատնուեցաւ: Յեղափոխութեան հիմնական պատճառը այն էր, որ մտահոգութիւն արտայայտուած էր երկրին իսլամացման քաղաքականութեան նկատմամբ, ինչպէս նաեւ երկրին իշխանութիւնը մէկ անձի ձեռքը աւելի կեդրոնացնելու առումով: Յեղաշրջման փորձ ընողները այս նպատակը կը հետապնդէին, ըստ ան՝ աւելցնելով, որ յեղաշրջումը եթէ յաջողէր ոչ ոք գիտէ, թէ Հայ դատին եւ հայութեան նկատմամբ ինչ կ'եցուածք պիտի ունենային յեղաշրջման նախաձեռնողները: Այդ պատճառով ալ հայութիւնը խանդավառուելու պատճառ չունի: Ճիշդ է, որ դժգոհութիւն կայ ներկայ իշխանաւորներէն, բայց զիրենք փոխարինողը անպայման իրենցմէ լաւը պիտի չըլլայ մեր տեսանկիւնէն:

ՀՅԴ Բիւրոյի անդամին համաձայն, թէեւ յեղաշրջումի փորձը ձախողեցաւ, բայց կը շարունակուի Էրտողանի յեղաշրջումի փորձը, որ մեծ մասամբ արդէն յաջողած է ու տակաւին ընթացքի մէջ է: Ինչպէս Էրտողան յեղաշրջումի օրն իսկ ըսաւ, այս մէկը Աստուծոյ կողմէ պարգեւ էր իրեն համար, որովհետեւ ասիկա իբրեւ պատրուակ ունենալով, այսօր Թուրքիոյ մէջ կը ձեռքբերուին հազարաւոր մարդիկ, որոնց մէկ մասը հաւանաբար կապ ունի յեղաշրջումին հետ, սակայն մէկ կարելոր մասն ալ ոչ մէկ առնչութիւն ունի եղածին հետ, կրնան ունայնաբար համախոհ ըլլալ, սակայն ուղղակի կապ ունեցած չըլլալ: Բայց եւ այնպէս ասիկա պետական համակարգին մէջ մաքրագործում կատարելու լաւ առիթ հանդիսացաւ, ուրկէ դուրս կը դրուին, ըստ Էրտողանին, այս յեղաշրջումին ետին կանգնող, Միացեալ Նահանգներ ապաստանած, ընդդիմադիր իսլամական քարոզիչ Ֆեթուլլա Կիւլենի հետեւորդները: Խորքին մէջ, ըստ Մանոյեանի, յեղաշրջումը Կիւլենին վերագրելը տրամաբանական չէ, թէեւ փորձին մասնակիցներուն մէջ կան կիւլենականներ, սակայն իսլամացման քաղաքականութիւնը Կիւլենի ուզածն է նաեւ, ան նման քաղաքականութեան դէմ կանգնելու հակակարծիք չի կրնար ըլլալ, եզրափակեց Մանոյեան:

Ըստ Մանոյեանի, Աշխարհին Ուշադրութիւնը Թուրքիայէն Շեղեցաւ Դէպի Հայաստան



ՀՅԴ Բիւրոյի անդամ, ՀՅԴ Բիւրոյի Հայ դատի եւ քաղաքական հարցերու գրասենեակի պատասխանատու Կիրո Մանոյեան՝ «Ա1+»-ի հետ ունեցած զրոյցին ընթացքին անընդունելի նկատած է տիրող կացութիւնը: «Մենք այս ոճին դէմ ենք: Ասիկա անհետանկարային մօտեցում է, եթէ չըսես, որ նաեւ վնասակար է: Խորքին մէջ մեզի համար ամենէն մեծ վնասը

արձանագրուեցաւ արտաքին ճակատի վրայ: Դեռ չենք գիտեր, թէ ինչպէս պիտի աւարտի այս դէպքը եւ եթէ նոր զոհեր իլլելու գնով պիտի ըլլայ ատիկա: Նման պարագայ մը աւելի խայտառակ պիտի ընէ Հայաստանը՝ միջազգային հանրութեան դիմաց», դիտել տուած է Մանոյեան:

Կիրո Մանոյեանի համաձայն, Երեւանի մէջ տեղի ունեցածը այնքան անսպասելի ու արագ կերպով կատարուեցաւ, որ ամբողջ աշխարհին մինչ այդ Թուրքիոյ վրայ կեդրոնացած ուշադրութիւնը շեղեցաւ դէպի Հայաստան:

«Ո՛չ միայն մեր երկրին մէջ ուշադրութիւնը շեղեցաւ Թուրքիոյ իրադարձութիւններէն, այլ նաեւ դուրսի ուշադրութիւնը, եւ մարդիկ սկսան նմանութիւններ գտնելու փորձեր րնել, երբ նմանութեան ոչ մէկ եզր գոյութիւն ունի: Այսինքն Հայաստանին մէջ տեղի ունեցածը խումբ մը դժգոհ մարդոց արարք է, եւ ոչ թէ իսկապէս հանրութեան աջակցութիւնը վայելող շարժում, մինչդեռ Թուրքիոյ մէջ տեղի ունեցածը խումբ մը զինուորականներու փորձ էր, եւ վստահ եմ, որ կար անոնց կողմնակից որոշ խաւ մը, բայց ոչ այնքան մեծ, որ թուրք զինուորականները յաջողէին: Իսկ Հայաստանի մէջ այդ խաւը չկայ ալ», ընդգծած է ՀՅԴ Բիւրոյի անդամը՝ միեւնոյն ատեն նկատել տալով. «Այսինքն այս չի նշանակեր, որ դժգոհութիւն չկայ Հայաստանի մէջ, այլ պարզապէս կը նշանակէ, որ Հայաստանի մէջ ժողովուրդը կը հասկնայ, որ այս միջոցներով հարց չի լուծուիր»:

«Ա1+»-ի թղթակիցը նաեւ ուզած է գիտնալ, թէ Դաշնակցութեան համար արդեօք ընդունելի՞ է յեղափոխութեան այս տարբերակը:

«Ներողութիւն, ասիկա յեղափոխութիւն չէ: Յեղափոխութիւնը մէկ արարքով չ'ըլլար, յեղափոխութիւնը, եթէ իսկապէս հասունցած ըլլար, մենք այսօր կ'ունենայինք հարիւր-հազարաւոր ճամբայ իջած ժողովուրդ, որ իր դժգոհութիւնը կ'արտայայտէր, բայց ասիկա չեղաւ: Այդ է յեղափոխութիւնը, բայց ոչ թէ այսպէս, որ մարդիկ փորձեն ինչ որ արարք գործել, թէկուզ ոստիկանական որեւէ կեղորոնի վրայ եւ յաջողութեան հասնին այդ պահուն: Վ'երջը: Ասոր շարունակութիւնը կամ վերջը ինչ է: Լա՛ւ, հիմա իշխանութիւնները կը համբերեն, բայց մինչեւ ե՞րբ պիտի համբերեն», պատասխանած է Մանոյեան:

Ուաշինգթոն Խստօրէն Կը Դատապարտէ Հայաստանի Մէջ Քաղաքական Նպատակներով Բռնութեան Օգտագործումը



«Ազատութիւն» ձայնասփիւռի կայանը կը հաղորդէ, որ Միացեալ Նահանգներ խստօրէն դատապարտած են Հայաստանի ոստիկանութեան դէմ զինեալ յարձակումը եւ Հայաստանի իշխանութիւններուն կոչ ուղղած են՝ «զսպուածութիւն» ցուցաբերելու պարեկապահակային ծառայութեան գունդի տարածքին մէջ պատանդներ պահած զինեալներուն հետ յարաբերութիւններուն մէջ:

«Մեր ցաւակցութիւնն ու աղօթքը կը յղենք կիրակի օր Երեւանի Էրեբունի թաղամասի մէջ տեղի ունեցած միջադէպին իբրեւ հետեւանք զոհուած եւ վիրաւորուած ոստիկաններուն ընտանիքներուն», յայտարարած է Միացեալ Նահանգներու արտաքին գործոց նախարարութեան բանբեր Մարք Թոնըրը:

«Մենք խստորեն կը դատապարտենք Հայաստանի կամ որեւէ այլ վայրի մէջ քաղաքական նպատակներով բռնութիւններու օգտագործումը», ըսած է Թոնըրը:

«Մենք Հայաստանի իշխանութիւններուն կոչ կ'ուղղենք՝ իրավիճակին մօտենալու հարկ եղած զսպուածութեամբ», աւելցուցած է ան:

Միացեալ Նահանգներու արտաքին գործոց նախարարութեան բանբերը նաեւ ընդգծած է, որ Միացեալ Նահանգները քաղաքական փոփոխութիւններու ուղի կը նկատեն ժողովրդավարական հոլովոյթները, «եւ մենք շրջահայեացութեան կոչ կ'ուղղենք բոլոր այն մարդոց, որոնք կը կարծեն, թէ բռնութիւնը կրնայ քաղաքական նպատակներու հասնելու ընդունելի ուղի ըլլալ»:

Դեսպան Միլզ Քաղաքական Փոփոխութեան Համար Բռնութիւնը Անընդունելի Կը Նկատէ

Հայաստանի մէջ Միացեալ Նահանգներու դեսպան Ռիչըրտ Միլզ 20 Յուլիսին անդրադառնալով Հայաստանի ոստիկանութեան պարեկապահակային ծառայութեան գունդի մը վրայ կատարուած զինեալ յարձակման՝ յայտարարած է, որ Հայաստանի մէջ քաղաքական փոփոխութիւններ կատարելու համար բռնութիւնը երբեք ընդունելի տարբերակ չի կրնար ըլլալ:

«19 Յուլիսին Միացեալ Նահանգներու արտաքին գործոց նախարարութեան կողմէ այս մասին հարց տրուեցաւ: Մեր կողմէ Հայաստանի իշխանութիւնները յորդորեցինք՝ իրավիճակը զսպուածութեամբ եւ արհեստավարժ ձեւով լուծելու: Հիմա ժամանակն է, որ բոլոր հայերուն կողմէ օրէնքի գերակայութեան նկատմամբ յարգանք դրսեւորուի, որպէսզի իրավիճակը խաղաղօրէն լուծուի, ինչ որ, կը կարծեմ, բոլորին փափաքն է», նշած է դեսպանը:

Ան դիտել տուած է, որ Միացեալ Նահանգներու դեսպանութիւնը ուշադիր կը հետեւին իրավիճակին: Դեսպանը, դեսպանութեան եւ իր անունով, ցաւակցութիւն յայտնած է զոհուած սպային հարազատներուն:

Խորենացի Փողոցին Մէջ Բախումներ Ոստիկանութեան Եւ Ցուցարարներուն Միջեւ

Չորեքշաբթի օր զիշեր Խորենացիի փողոցին մէջ թե՛ բախումներ տեղի ունեցան ցուցարարներուն ու ոստիկաններուն միջեւ: Ցուցարարները սկսան քարեր նետել ոստիկաններուն ուղղութեամբ, իսկ ոստիկանները, իբրեւ պատասխան, կազային պայթուցիկներ նետեցին ցուցարարներուն ուղղութեամբ: Ցուցարարները քիչ-քիչ նահանջեցին՝ շարունակելով տարբեր առարկաներ ու քարեր նետել ոստիկաններուն ուղղութեամբ: Փողոցին մէջ կանգ առած ինքնաշարժներ այրեցան ու վնասուեցան:

Այս բախումները ընթացք առին, երբ քաղաքացիները ուզեցին իրենց հաւաքած սնունդը փոխանցել պարեկապահակային ծառայութեան գունդի տարածքը գրաւած զինուած խումբին, սակայն ոստիկանները մերժեցին՝ յայտարարելով, որ անոնք սնունդի կարիք չունին: Մարդիկ սկսան յարձակիլ եւ քարեր նետել:

Աւելի ուշ առողջապահութեան նախարարութիւնը հրապարակեց յայտարարութիւն մը՝ հաղորդելով, որ վերոյիշեալ դէպքին իբրեւ հետեւանք, նախնական տուեալներով,

հիւանդանոցներուն մէջ կան 45 վիրաւորներ, որոնցմէ 25-ը՝ ոստիկան: 18 հոգի տեղափոխուած է շտապօգնութեան ինքնաշարժներով, միւսները անձամբ գացած են հիւանդանոց: Բժշկական ծառայութիւններ եւ օգնութիւն տրամադրուած է բոլորին:

Մինչ այդ, Ազգային անվտանգութեան ծառայութիւնը 20 Յուլիսի յետմիջօրէին յայտարարեց, որ Հայաստանի ոստիկանութեան պարեկապահակային ծառայութեան գունդի տարածքը զինուած յարձակմամբ զարթելու եւ այնտեղ պատանդներ պահելու առնչութեամբ 17 Յուլիսի վաղ առաւօտէն մինչեւ տուեալ պահը իրականացուող հակաահաբեկչական գործողութեան ծիրին մէջ, ազատ արձակուած են հինգ անձեր: Անոր համաձայն, աշխատանք եւ բանակցութիւններ կը կատարուին միւս պատանդները եւս ազատ արձակելու ուղղութեամբ:



Ազգային անվտանգութեան ծառայութիւնը անգամ մը եւս շեշտեց, որ ձեռնարկուող միջոցառումները առանձնայատուկ են եւ խիստ մասնագիտական, ուստի զանոնք կազմակերպող եւ իրականացնող անձերը կողմնակի միջամտութեան կամ օժանդակութեան կարիք չունին:

«Հայաստանի իրաւապահ մարմիններու յատուկ ստորաբաժանումները կը շարունակեն մնալ մարտական պատրաստուածութեան վիճակի մէջ, սակայն անոնց աշխուժ գործունէութեան համար առայժմ անհրաժեշտ նախադրեալներ չկան», եզրափակեց ծառայութիւնը:

Աւելի ուշ Ազգային անվտանգութեան ծառայութենէն «Թերթ»-ին յայտնեցին, որ «Հիմնադիր խորհրդարան»-ի անդամ Կարօ Եղնուկեան ձերբակալուած է: Աւելի կանուխ «Նոր Հայաստան» միութենէն յայտարարած էին, որ Ազգային անվտանգութեան ծառայութենէն աշխատակիցներ խուզարկած են Կարօ Եղնուկեանի բնակարանը:

Իրաւապահ Մարմինները Կը Շարունակեն Բանակցութիւնները Զինեալ Խումբի Անդամներուն Հետ

Հայաստանի Ազգային անվտանգութեան ծառայութիւնը կը շարունակէ տեղեկատուութիւն տրամադրել 17 Յուլիսին Հայաստանի ոստիկանութեան պարեկապահակային ծառայութեան գունդի տարածքին վրայ կատարուած զինեալ յարձակման իբրեւ հետեւանք ստեղծուած իրավիճակին մասին:



19 Յուլիսին հրապարակուած հաղորդագրութեան մէջ նշուած է, որ Հայաստանի իրաւապահ մարմիններու ներկայացուցիչները կը շարունակեն հետեւողական բանակցութիւններ վարել զինուած խումբի անդամներուն հետ՝ առանց յատուկ գործողութիւններու իրականացման անոնց իշխանութիւններուն յանձնուիլը կազմակերպելու եւ պատանդներուն ազատ արձակումը ապահովելու նպատակով:

«Հայաստանի իրաւապահ մարմինները կարելի ամէն ինչ կ'ընեն՝ զինուած խումբը նոր արինահեղութենէ հեռու պահելու համար, եւ ունին բաւարար ներուժ եւ կարողութիւններ իրենց առջեւ դրուած խնդիրները կատարելու համար: Հայաստանի Ազգային անվտանգութեան ծառայութիւնը կը յորդորէ բոլորին՝ չմիջամտել իրաւասու մարմիններու բացառիկ գործունէութեան տիրոջին մէջ գտնուող հարցերու լուծման, չխոչընդոտել անոնց գործողութիւններու պատշաճ եւ արդիւնաւետ իրականացման, այդպիսով ալ աջակցելով փափաքելի արդիւնքի նուաճման», նշուած է հաղորդագրութեան մէջ:

Չորեքշաբթի օր զինուած խումբի յարձակման պատճառով զոհուած ոստիկանութեան գնդապետ Արթուր Վանոյեանին վերջին հրաժեշտը տուին հարազատները, ընկերները, ոստիկան գործընկերները, ինչպէս նաեւ Ազգային ժողովի պատգամաւորներ:

49 տարեկանին կեանքէն հեռացած գնդապետը ճանչցողները զայն պիտի յիշեն իբրեւ ընտանիքի նուիրուած հայր, սիրելի զաւակ եւ պարտաճանաչ ոստիկան: Ընկերներուն հաստատումով, Արթուր Վանոյեան դրական անձնատրութիւն էր, որ որքան ալ յառաջընթաց ունեցաւ իր ասպարէզին մէջ, միշտ ալ մնաց նոյնը եւ իր աշխատակիցները յորդորեց նախ եւ առաջ ըլլալ մարդ, յետոյ ոստիկան:

Միւս կողմէ, Երեւանի Ազատութեան հրապարակին վրայ «Ո՛չ թալանին» նախաձեռնութեան կազմակերպած հաւաքը շարունակուեցաւ երթով: Հանրահաւաքին ընթացքին տեղի ունեցած որոշ անախորժ միջադէպերու արձագանգեց Հայաստանի ոստիկանութիւնը:

Դէպքի վայր հասած Հայաստանի ոստիկանութեան պետի առաջին տեղակալ Յունան Պօղոսեան յորդորեց հաւաքուած քաղաքացիները՝ ոստիկանութեան տրամադրելու բռնութեան կամ ապօրինութեան վերաբերեալ իրենց ունեցած տեղեկութիւնները:

«Անկարգները բերման կ'ենթարկուին, իսկ եթէ ոստիկանները սխալներ գործած են, անոնք կը պատժուին: Բոլոր նիւթերը տրամադրեցէք իշխանութեան ու կը կատարուի ծառայողական քննութիւն», նշեց Պօղոսեան:

Յոյցին վերաբերեալ յայտարարութիւն հրապարակած է նաեւ Հայաստանի Մարդու իրաւունքներու պաշտպանի գրասենեակը՝ կոչ ուղղելով բոլորին պահպանելու հաւաքներուն խաղաղ բնոյթը՝ սահմանադրութեան եւ օրէնքի տառին համապատասխան:

«Անհրաժեշտ է բացառել բռնութեան որեւէ դրսեւորում: Բոլոր արձանագրուած դէպքերուն առնչութեամբ իրաւասու մարմիններուն կողմէ անհրաժեշտ է մանրամասն քննութիւն կատարել: Մենք շուրջօրեայ դրութեամբ կը կատարենք մեր աշխատանքները՝ գործընթացներուն հետեւելով եւ միջոցներու ձեռնարկելով», նշուած է հաղորդագրութեան մէջ:

Ազատութեան հրապարակէն երթը ուղղուեցաւ Հիւսիսային պողոտայ-Հանրապետութեան հրապարակ-Ամիրեան փողոց ուղղութեամբ:

Նշենք, որ աւելի ուշ, հայաստանեան լրատուամիջոցները տեղեկութիւններ փոխանցեցին, թէ Երեւանի արուարձան Սարի թաղին մէջ քաղաքայիններու եւ ոստիկանութեան միջեւ արձանագրուած են բախումներ, որոնց իբրեւ հետեւանք 4 ոստիկաններ վիրաւորուած են:

ՄԻՋԱԶԳԱՅԻՆ

«Ուիքիլիքս» Հրապարակած Է Թուրքիոյ Իշխող Կուսակցութեան Ելեկտրոնային Նամակները

«ՌԻԱ Նովոսթի» կը հաղորդէ, որ «Ուիքիլիքս» հրապարակած է Թուրքիոյ իշխող՝ Արդարութիւն եւ բարգաւաճում կուսակցութեան ելեկտրոնային նամակներու առաջին մասը՝ շուրջ 290.000 հատ:

«Ուիքիլիքս» յայտարարած է, որ պիտի հրապարակէ Թուրքիոյ իշխող կուսակցութեան պատկանող շուրջ 500.000 փաստաթուղթ եւ 300.000 ելեկտրոնային նամակ:

«Ելեկտրոնային նամակները վերցուած են Արդարութիւն եւ բարգաւաճում կուսակցութեան գլխաւոր akparti.org.tr կայքէն: Վերջին հաղորդագրութեան թուականն է 6 Յուլիս 2016, իսկ հնագոյնը՝ 2010: Կայքին հետ կապուած ելեկտրոնային նամակները հիմնականին մէջ կը վերաբերին համաշխարհային հարցերուն», կ'ըսէ «Ուիքիլիքս»:

Նամակներու հրապարակումին զուգահեռ Թուրքիոյ մէջ տեղի կ'ունենան զանգուածային ձերբակալութիւններ, որոնք յաջորդեցին 16 Յուլիսին ջաջողած պետական յեղաշրջման:

«Ուիքիլիքս» նաեւ հաղորդեց, որ իր կայքը կայքահէններու կողմէ յարձակումի ենթարկուած է արգելակելու համար ե-նամակներուն հրապարակումը, սակայն ի գուր:

«Ուիքիլիքս» նաեւ հաղորդեց, որ թրքական իշխանութիւնները Թուրքիոյ մէջ արգելափակած են իր կայքը:

Վրաստանի Եւ Թուրքիոյ Կառավարութիւնները Պիտի Ստեղծեն Բարձր Մակարդակի Ռազմավարական Խորհուրդ

«Արմէնփրես» կը նշէ, որ Վրաստանի կառավարութեան վարչակազմը կը հաղորդէ, որ Վրաստանի եւ Թուրքիոյ կառավարութիւնները համաձայնութիւն գոյացուցած են ստեղծելու բարձր մակարդակի ռազմավարական խորհուրդ:

Վարչակազմին համաձայն, համապատասխան փաստաթուղթը ստորագրած են Վրաստանի վարչապետ Կէրկի Քվիթիքաշվիլին եւ անոր թուրք պաշտօնակիցը՝ Պինալի Երլտըրընը: Ստորագրութեան արարողութիւնը կայացած է Անգարայի մէջ՝ Վրաստանի վարչապետին Թուրքիա կատարած պաշտօնական այցելութեան ծիրին մէջ:

Փաստաթուղթին համաձայն, Վրաստանի եւ Թուրքիոյ կառավարութիւնները կը խորացնեն համագործակցութիւնը ներդրումներու փոխադարձ խրախուսման եւ ատոր պաշտպանութեան ուղղութեամբ:

Երկու երկիրներու կառավարութիւնները համաձայնութիւն գոյացուցած են աշխատանքի, ընկերային պաշտպանութեան եւ աշխատանքի տեղաւորման ոլորտներուն մէջ համագործակցելու:

ԱՆՂՐԱԴԱՐ

Այսօրը



Հայկական այսօրը տխուր պատկեր մը կը ներկայացնէ, որովհետեւ կը պատահի աներեւակայելին: Կը պատահի այն, որ Արցախի բանակցութիւններու ըստ երեւոյթին ամենէն ճակատագրական հանգրուանին, ոմանք իրենց ընթացքով կը յաջողին հայկական ներքին կեանքը աննախընթաց կերպով պառակտել: Յանցաւորներ մատնանշելու համար չէ, որ ցաւով կը գրենք այս քանի մը տողերը: Ատիկա աւելի ուշ ընելը թէ՛ աւելի խելացի է, թէ՛ աւելի օգտակար: Հիմա այս վիճակէն դուրս գալը աւելի՛ հրամայական է: Հայութեան առջեւ վերջերս յաճախ լարուող ծուղակներէն ճարպիկօրէն

խուսափիլը շատ աւելի կենսական է:

Ամենէն մեծ ու վտանգաւոր ծուղակը այս տարուան ապրիլին ազերիական լայնածաւալ յարձակումն էր: Կոյրն ալ պիտի տեսնէր, որ ստիկա պատահեցաւ Հայաստանը բանակցութիւններու սեղանին վրայ ծունկի բերելու նպատակով: Այդ փորձը չյաջողեցաւ շնորհիւ համահայկական բռն ղիմադրութեան, մանաւանդ՝ հայ զինուորի եւ քաղաքացիի անսակարկ հայրենասիրութեան եւ հակառակ հայկական կողմին մօտ երեսն եկած բոլոր տկարութիւններուն: Փաստուեցաւ ճիշդը. այսինքն՝ թէ ներքին հարցերն ու հաշիւները մէկ կողմ կը ծալուին, երբ վտանգուած են հայրենիքն ու հայոց պետականութիւնը: Մինչդեռ ամենէն լաւատեսները նոյնիսկ կ'ակնկալէին, որ հայրենասիրական կայծը մարած պէտք է ըլլայ ընկերային արդարութեան մարզին մէջ հայկական պետութեան ակնբախ անկատարութեան պատճառով:

Հայութեան վրայ բանեցուած զինուորական ճնշումի ձախողութենէն ետք ականատես եղանք դիւանագիտական բացայայտ ճնշումներուն, որոնք գործածեցին աւելի քան քսանամեայ ձանձրացնող յանկերգը. փուլային ու փաթեթային, տարածքներու յանձնում, Հայաստանի նախագահ (փոխտող) ու Ալիեւ (մնայուն) եւ համանման եզրերու գործածութիւն՝ առաւել կամ նուազ չափով նոյն տեսակի նախադասութիւններու մէջ շարուած: Հակառակ քաղաքական ճնշումներուն, դժուար է մտածել, թէ Արցախի հարցի դիւրին եւ հիմնովին ոչ հայանպաստ լուծումի մը հորիզոնի վրայ երեւումը մօտալուտ է: Հայութիւնը տակաւին ամուր է:

Հայութեան կորովը տկարացնելու համար կը մնայ ի գործ դնել ամենէն զգուելի տարբերակը, որ կրնայ շահագրգիռ կողմերը յաջողութեան առաջնորդել կարելոր հաւանականութեամբ. ստիկա ալ ներքին պառակտման սերմանումն է: Այս մարզին մէջ յաջողելու կարելիութիւնները մեծ են, որովհետեւ հայկական հասարակութեան մէջ ատոր համար կայ անհրաժեշտ մթնոլորտը՝ պատրուակներն ու իսկական պատճառները: Իշխանութիւններու պարտականութիւնն է, ի հարկէ, ի գործ դնել ամեն միջոց վերացնելու համար բոլոր պատրուակները եւ մանաւանդ՝ հասարակական լայնածիր դժգոհութեան պատճառները: Ընկերային արդարութիւնը կ'ամրապնդէ հայրենիքի եւ ազգային հաւաքականութեան հետ կապը եւ անոնց հանդէպ սէրը: Ասիկա առաջնահերթ պայման է որեւէ պետութեան գոյութեան ապահովման համար. մանաւանդ՝ հայկականին նման պետութեան համար, որ այլապէս շատ խոցելի է արդէն: Հայաստանի իշխանութիւնները թափանցիկ ու տեսանելի կերպով, կարելի է ըսել նոյնիսկ՝ ցուցական միջոցներով պէտք է անյապաղ լծուին այդ աշխատանքին:

Ներկայ հանգրուանը սակայն աւելի քան երբեք կը պահանջէ ողջմտութիւն՝ հայութեան բոլոր առարկայական ու ենթակայական կարելիութիւնները կեդրոնացնելով Արցախի հարցին վրայ: Ատիկա ընելու համար ներքին անդորրի վերահաստատումը պայման է: Ասկէ առաջ ալ ոմանք փորձած են հայութիւնը պառակտել. չարաչար ձախողած են: Պէտք չէ մտահան ընել, որ Արցախը ազատագրուեցաւ, երբ հայոց ազատամարտիկները առիծի նման մէկ մարդու պէս կը կռուէին եւ միաժամանակ ազերիները ներքին խնդիրներով զիրար կը բզկտէին:

ՄԿՐՏԻՉ ՄԿՐՏԻՉԵԱՆ

ԱԿՆԱՐԿ

Չխանգարել Բանակցութիւնները

Դրական պէտք է ընկալել երկկողմանիօրէն՝ իրաւապահ մարմիններու եւ զինեալ գործողութիւնը իրականացնողներու դրութիւնը: Երեւոյթը պէտք չէ վերագրել անպայման կապի խզումին, նոր դաւադրութիւններու մշակման կամ գործողութեան վերջ տալու նպատակով նախապատրաստուող յարձակման: Ոչ ալ՝ հիւծել-յանկարծակիօրէն գրոհել տարբերակին: Երբ համեմատաբար լուռ են կողմերը, կը նշանակէ, որ բանակցութիւններ կան, իսկ այդ բանակցութիւններուն փակագիծերը չեն բացուիր, որովհետեւ մարդոց ճակատագիրը խնդրոյ առարկայ է, որովհետեւ կայ յայտնապէս արինահեղութիւնը բացառելու գիտակցում:

Հետեւաբար պահանջներ-ընդառաջումներ կամ չընդառաջումներ, զինեալներու կամ ոստիկաններու տեղաշարժերը իբր թէ նկատողներ, տարածք գրաւողներուն «մինչեւ վերջ գացէ՛ք» ըսողներ կամ պետական ծառայողներուն հասցէին ամեն տեսակի հայհոյանք թափողներ երեւութապէս չեն ազդեր երկու կողմերուն առնելիք քայլերուն վրայ, որովհետեւ երկու կողմերն ալ – կ'ուզենք հաւատալ նախադրեալներէն եւ երեւոյթներէն մեկնած – բանակցելով եւ ցարդ կատարուած յայտարարութիւններուն մէջ դրական ելքերու, պատուհաններու շրջագիծեր ուրուագծելով գերադաս կը նկատեն առանց մարդկային զոհերու աւարտել գործողութիւնը:



Թէժացնողները, պառակտիչ եւ հրահրիչ յայտարարութիւն կատարողները, «մինչեւ վերջ մի՛ յանձնուիք» կամ «գրոհեցէ՛ք» յանձնարարողները յայտնապէս երկու կողմերուն գիտակցական մօտեցումով չեն վերաբերիր այս խնդիրին:

Լռութիւնը միշտ չէ, որ կրաւորականութիւն է, անտարբերութիւն, անկարողութիւն կամ արհամարհանք:

Իսկ այս պարագային աւելի համոզիչ է, որ այդպէս չէ: Նման ճգնաժամի պայմաններուն մէջ համեմատական լռութիւնը բանակցութիւն է: Իսկ բանակցիլը ուժի կիրարկման բացառումով խաղաղ լուծումի յանգելու համար է: Երկու կողմերուն լռութիւնը այս կը նախանշէ, մնացեալը՝ եթէ այս տրամաբանութենէն դուրս է, կրնայ խանգարիչ ըլլալ: Իսկ խանգարումը կը վերաբերի մարդոց կեանքերուն:

Առ այս պահը խանգարողները չեն յաջողած ազդել բանակցողներուն վրայ: Պիտի ուզէինք, որ չազդէին:

«Ա.»

ԼՈՒՐԵՐ ԳՍՂՈՒԹՆԵՐԷՆ

«Տը քաթ» Ժապաւէնի Ցուցադրութիւնը



12 յունիսին «Գրիգոր եւ Աւետ Քիւրքչիօղլու» սրահին մէջ տեղի ունեցաւ «Տը քաթ» ժապաւէնի ցուցադրութիւնը:

Պոլսահայ միութեան մշակութային յանձնախումբին անունով տոքթ. Յովհաննէս Գուլակ Աւետիքեան կարդաց ժապաւէնը արտադրող գերման-թուրք ծնողներէ սերած Ֆաթիհ Աքինի կենսագրութիւնը բացատրութիւններ տալով ժապաւէնին մասին:

«Տը քաթ» ժապաւէնի անդրանիկ ցուցադրութիւնը տեղի ունեցած էր Վենետիկի շարժապատկերի փառասօսին: Ժապաւէնը կը ներկայացնէ 1915 թուականին տեղի ունեցած ամենացաւալի տեսարանները Թուրքիոյ պատմութեան էջերէն, Հայոց ցեղասպանութեան մասին:

«Տը քաթ» ժապաւէնի տեսարանները նկարահանուած են՝ Յորդանանի, Գերմանիոյ, Քուպայի, Քանադայի եւ Մալթայի մէջ, սակայն պատմութիւնը տեղի կ'ունենայ Թուրքիոյ հարաւարեւելքը:

Ֆաթիհ Աքին կատարած է բազմաթիւ հետազոտութիւններ՝ լոյսին բերելով 1920-ական թուականներուն Հաւանա գացած հայերու օրագիրներ, ինչպէս նաեւ բերանացի պատմութիւններ եւ գրականութիւն՝ մահուան երթերուն մասին: Ան հաւաքած է վկաներու շատ հարուստ դիմանկարներ եւ փորձած է զանոնք միացնել:

**Հոլանտայի Ալմելօ Քաղաքի Հայ Համայնքը
42 ՀազարԵրօ Կը Հանգանակէ Արցախի Համար**



Հոլանտական քանի մը հայ համայնքներ եւ կազմակերպութիւններ իրենց օգնութիւնը ցուցաբերած են Արցախին:

Ըստ «Նիտերլանտական Օրագիր»-ի անցած կիրակի օր, Ալմելոյի Հայ առաքելական Ս. Գրիգոր Լուսաւորիչ եկեղեցւոյ մէջ տեղի ունեցած է Ս. պատարագ եւ հոգեհանգստեան կարգ՝ Լեռնային Դարաբաղի

Հանրապետութեան ապրիլեան քառօրեայ պատերազմին զոհուածներու հոգիներուն համար: Այս կապակցութեամբ բացուած բարեգործական հիմնադրամին, բացի Ալմելոյի տարբեր հայկական կազմակերպութիւններէն, իրենց օժանդակութիւնը ցուցաբերած են նաեւ Նայմեխէն քաղաքի «Միացեալ հայերը Հոլանտայի մէջ» կազմակերպութեան անդամները: Արդէն հանգանակուած է աւելի քան 42 հազար երօ:

«Հրանդ Տինք Հիմնարկ»-ի Հայկական Դասընթացը



11 Յուլիսին սկսան «Հրանդ Տինք հիմնարկ»-ի կազմակերպությամբ հայերենի խտացեալ դասընթացքները, որոնք պիտի տեսնեն մեկուկէս ամիս:

Դասընթացքներուն կը մասնակցին ակադեմական շրջանակներէ եկած անձեր: Դասերը կ'ընթանան երկու մակարդակի

վրայ. առաջինին կը մասնակցին բնաւ հայերէն չգիտցողներ, իսկ երկրորդին՝ մետրոպեան տառերուն ծանօթ եղողներ: Այս ծրագրին զուգահեռ, կը շարունակուի նաեւ այլ ծրագիր մը, որուն կը հետեւին հայ մշակոյթին մասին իրենց գիտելիքները յառաջացնել ուզող ակադեմականներ, որոնցմէ շատերը իրենց ուսումնասիրած նիւթերուն բերմամբ կը հետաքրքրուին հայերէնով: Երկու ծրագիրներուն համար ալ պաշտօնի կոչուած են մասնագէտ ուսուցիչներ:

Ընկերային գիտութիւններու զանազան նիւթերով այս խմբաւորումներուն մէջ կը հանդիպինք՝ պատմաբաններու, հնագէտներու, քաղաքական գիտելիքներ սերտողներու եւ այլոց, որոնք սիրողական դրդումներով չեն մասնակցիր, այլ՝ բոլորովին արհեստավարժ գիտակցութեամբ եւ կ'ուզեն զինուիլ իրենց համար խիստ կարեւոր գիտելիքներով:

Վազգէն Շուշանեանի Եւ Համաստեղի ՆուիրուածԳրական Երեկոյ



6 Յուլիսին Իրանահայերու միութեան գրադարանի ընթերցասրահին մէջ տեղի ունեցաւ Քալիֆորնիոյ հայ գրողներու միութեան հերթական գրական երեկոն՝ նուիրուած արեւմտահայ դասական գրողներ Վազգէն Շուշանեանի եւ Համաստեղի:

Օրուան բանախօսներն էին Յովսէփ Նալպանտեան, որ խօսեցաւ Վազգէն Շուշանեանի մասին, իսկ Գարուշ Յարեանց խօսեցաւ Համաստեղի մասին: Անոնք անդրադարձան զոյգ գրողներու ազգային եւ համամարդկային արժէքները դաւանող գործունէութեան: Օրուան հանդիսավար Արմէն Խանճեան կարդաց օրուան հեղինակներու ստեղծագործութիւններէն հատուածներ:

Ձեռնարկի ընթացքին գործադրուեցաւ գեղարուեստական յայտագիր:

Քալիֆորնիոյ հայ գրողներու միութեան անդամներ, գրող, պատմաբան Արծրուն Ալեքսանեան եւ արձակագիր Նորա Ահարոնեան, պատմեցին հայրենիք կատարած իրենց այցելութեան մասին:

WWW.ARMENIANPRELACYKW.COM

Գրական Երեկոյ՝ Նուիրուած Փիթըր Պալաքեանի



27 յունիսին Ս. Լուսաւորիչ եկեղեցւոյ «Փաշալեան» սրահին մէջ տեղի ունեցաւ գրական երեկոյ՝ նուիրուած վերջերս «Փուլիցըր» մրցանակին տիրացած Փիթըր Պալաքեանի:

Օրուան հանդիսավար տոքթ. Հրանդ Մարգարեան յաւելեալ մանրամասնութիւններ տուաւ այս մրցանակին եւ Պալաքեանի վաստակին մասին:

Փրոֆ. Խաչիկ Թէօլեօլեան տեղեկութիւններ տուաւ եւ վերլուծումներ ըրաւ Պալաքեանի «Օգոն ժուռնալ» գիրքին մասին՝ անդրադառնալով անոր բանաստեղծութիւններուն:

Աւարտին շնորհակալական խօսքով ելոյթ ունեցաւ Փիթըր Պալաքեան, իսկ թեմի առաջնորդ Օշական արք. Չօլոյեան շնորհաւորեց Պալաքեանը՝ յայտնելով, որ անգլերէն գիրերով խոր հայկականութեամբ մը դրոշմուած են անոր գործերը:

Մոնրէալահայ Ժոէլ Կը Հրապարակէ Մանկական Հայերէն Երգերու Խտասալիկ Մը



Լիբանան ծնած մոնրէալահայ մանկավարժուհի Ժոէլ Զինչինեան այս տարի հրապարակեց մանկական երգերու իր առաջին խտասալիկն ու տեսահոլովակը: Ժոէլ մանկավարժութիւն ուսանած է Մոնտրանսի քոլեճին մէջ, ապա 8 տարի Սուրբ Յակոբ վարժարանի ՀՕՄ-ի Ծաղկոցէն ներս պաշտօնավարած է որպէս ուսուցչուհի: Ան

կատարած է ներկայացումներ՝ տարեդարձներու, համայնքային ձեռնարկներու, քերմեսներու եւ այլ փառատօներու ընթացքին:

Ժոէլ անցեալ տարի Լիբանան այցելութեան ընթացքին ծանօթացած է երաժիշտ Սեդո Պաղտասարեանին, որուն հետ գործակցաբար մէկ շաբթուան ընթացքին ձայնագրած է իր խտասալիկի 5 երգերը: Մոնրէալ վերադառնալէն ետք Փոլ Մալախանեանի հետ գործը աւարտած է յաւելեալ 5 երգերով:

Ժոէլ պիտի պատրաստէ նաեւ մանկական տեսերիզ մը, որուն մէջ երգերուն կ'ընկերակցին՝ պարեր, խաղեր, փոքրիկներ, գոյներ եւ նկարներ:

www.astagdaily.com

ԱՅԼԱԶԱՆ

Ի՞նչ Գիտենք Ընկոյզի Մասին



Ընկոյզի հայրենիքը Փոքր եւ Միջին Ասիաներն են: Ընկոյզը համարուած է «ընկուզեղէնի արքան», իսկ անոր միջուկին արտաքին նմանութիւնը մարդու ուղեղին հետ՝ հին իմաստասէրներուն ենթադրել տուած է, որ ընկոյզը ունի «մտածելու» ունակութիւն:

Ըստ պահպանուած պատմական ձեռագիրներու, Բաբելոնի քուրմերը արգիլել են հասարակ ժողովուրդին ընկոյզ ուտել, քանի որ խելացի մարդոց աւելի դժուար

կ'ըլլար կառավարելը:

Հին հայերը ծանօթ էին ընկոյզին բարձր սննդային արժէքին: Յատուկ ձեւով մշակուած, մեղրի եւ իւղի մէջ պահածոյացուած ընկոյզը նպաստած է զինուորներուն ֆիզիքական ուժի եւ ռազմական հնարամտութեան պահպանման:

Ընկոյզին Սննդական Արժէքը

Հասուն ընկոյզի միջուկը հարուստ է բազմաչազեցած ճարպերով, քոլեսթերոլէ զուրկ ճարպաթթուներով, ամինաթթուներով, կիրով, մակնեզիումով, Էօ. եւ Պէ. խումբի կենսասնիւթերով եւ այլն...

Ահա թէ ինչո՞ւ ընկոյզը թելադրելի է բոլորին: Տարբեր ուսումնասիրութիւններ կը փաստեն, որ ընկոյզի միջոցով կարելի է բուժել բարորակ ուռուցքներ եւ չէզոքացնել տարբեր տեսակի բորբոքումներ: Անիկա օգտակար է անքնութեան եւ ընկճախտի պարագային:

Ընկոյզը ունի երիտասարդացնող, իսկ աւելի ճիշդ՝ ծերացումը դանդաղեցնող յատկութիւն:

Ընկոյզը նաեւ օգտակար է սրտանօթային եւ մարսողական համակարգին

Ուշադրութի՛ւն

Ընկոյզը հակացուցուած է գերզգայնութիւններու ենթակայ անձերուն, մորթային հիւանդութիւններ (փսորիազիս, էկզեմա եւ այլն...) ունեցողներուն եւ արեան լերդացման խախտումներու պարագային:

Անկախ ընկոյզի օգտակար յատկութիւններէն բժիշկները կը թելադրեն օրը 100 կրամէն աւելի ընկոյզ չուտել:

WWW.AZTARAR.COM

Պաշտօնական Ընթրիքի Սը Սեղանին Շուրջ...

- 1 -

Ճաշարանը, երբ կերակուրները կը հասնին, «բարի ախորժակ» կը մաղթենք նախքան ուտելու սկսիլը:

ՄԽԱԼ, այս խօսքը մտերիմներու մէջ թերեւս կ'ըսուի, բայց ոչ՝ պաշտօնական ընթրիքի մը ընթացքին: Մաղթանքի կամ այլ խօսքի կարիք չկայ:

- 2 -

Ընթրիքը աւարտած է: Ձեր ձեռքերը կը դնէք սեղանին, ձեր պնակին երկու կողմերուն:

ՃԻՇԴ, երբեք արմուկները սեղանին չեն դնէր, ոչ ալ սեղանին տակը՝ ծունկերուն վրայ:



- 3 -

Երբ ընթրիքի մը հրաւիրուած ենք, պէտք է ճշդուած ժամանակին հասնինք:

ՄԽԱԼ, պաշտօնական ընթրիքի մը պէտք է, որ ճշդուած ժամէն քառորդ ժամ ուշ հասնինք: Այդ քառորդ ժամը կը կոչուի «քաղաքավարութեան քառորդ ժամ», որ առիթ կու տայ տանտիկինին վերջին դասաւորումները ընել՝ նախքան հիւրերուն ժամանումը:

- 4 -

Երբ ընթրիքը աւարտած էք դանակն ու պատառաքաղը զուգահեռ պէտք է դնէք պնակին մէջ:

ՄԽԱԼ, ընթրիքը աւարտելէ ետք դանակն ու պատառաքաղը պնակին մէջ պէտք է զետեղել ժամը 4:00-ին 20 մնացած սլաքներու դիրքով: Պատառաքաղը ակոսները դէպի վեր, իսկ դանակին շեղբը դէպի պատառաքաղ դարձած:

- 5 -

Սեղանին դրուած հացի կտորը քիչ մը մեծ է, դանակով կը կտրէք գայն:

ՄԽԱԼ, հացը երբեք դանակով չենք կտրէր, այլ պարզապէս՝ ձեռքով, առանց շատ մեծ ուշադրութիւն գրաւելու:

- 6 -

Ընթրիքի սեղանին շուրջ յանձնարարելի է քաղաքական նիւթերու մասին չխօսիլ, մանաւանդ եթէ անձանօթ հիւրեր ալ կան:

ՃԻՇԴ, կենցաղավարութիւնը կը պահանջէ, որ ընթրիքի սեղանին շուրջ, մանաւանդ երբ անձանօթ հիւրեր ալ կան, պէտք է հրաժարիլ քաղաքական, դրամական եւ կրօնական նիւթեր արծարծելէ: